



Կարգապահական գործ թիվ 17065

Հայաստանի Հանրապետության փաստաբանների պալատի խորհրդի
2018թ-ի մարտի 01-ին թիվ 41-րդ ԿԳ նիստի

Ո Ր Ո Շ ՈՒ Մ ԹԻՎ ԿԳ/30-Ա

**ՓԱՍՏԱԲԱՆ ՏԻԳՐԱՆ ԵԳՈՐՅԱՆԻՆ ԿԱՐԳԱՊԱՀԱԿԱՆ ՊԱՏԱՍԽԱՆԱՏՎՈՒԹՅԱՆ
ԵՆԹԱՐԿԵԼՈՒ ՀԱՐՑԸ ՔՆՆԱՐԿԵԼՈՒ ՄԱՍԻՆ**

ՀՀ փաստաբանների պալատի (**այսուհետ՝ նաև Պալատ**) խորհուրդը (**այսուհետ նաև՝ խորհուրդ**), նիստը նախագահող՝ Տարոն Սիմոնյանի, խորհրդի անդամներ՝ Սիմոն Բաբայանի, Հարություն Հարությունյանի, Նելլի Հարությունյանի, Կարեն Մեժլումյանի, Կարեն Սարգսյանի

քարտուղարությամբ՝ Նոննա Համբարձումյանի, քննության առնելով փաստաբան Տիգրան Եգորյանին (արտոնագիր՝ 1187) (**այսուհետ նաև՝ Պատասխանող**) կարգապահական պատասխանատվության ենթարկելու վերաբերյալ հարցը՝

Պ Ա Ր Զ Ե Ց՝

1. Կարգապահական վարույթ հարուցելու առիթը և հիմքը.

10.07.2017թ. Պալատում մուտքագրվել է Երևան քաղաքի Աջափնյակ և Դավթաշեն վարչական շրջանների ընդհանուր իրավասության դատարանի (**այսուհետ նաև՝ Դատարան կամ Դիմող**) դատավոր Տաթևիկ Գրիգորյանի՝ «Դատական սանկցիա կիրառելու մասին» 30.06.2017թ. որոշումը (**այսուհետ նաև՝ Որոշում**), որում նշվել է, որ Դատարանի վարույթում քննվող թիվ ԵԱԴԴ/0028/01/17 քրեական գործով 2017թ. հունիսի 30-ի հերթական դատական նիստում Դատարանը որոշում է կայացրել ամբաստանյալ Գևորգ Սաֆարյանի նկատմամբ դատական սանկցիա կիրառելու մասին, և ամբաստանյալ Գևորգ Սաֆարյանը հեռացվել է դատական նիստերի դահլիճից տասը ժամ ժամանակով, որից հետո դատական նիստն ընդմիջվել է մեկ ժամ ժամանակով:

Մեկ ժամ անց՝ ժամը 15:39-ին, դատական նիստը վերսկսվելուց հետո, ամբաստանյալ Գևորգ Սաֆարյանի պաշտպան Տիգրան Եգորյանը (**այսուհետ՝ նաև Պատասխանող**) դատական նիստին ներկա չի եղել, իսկ չներկայանալու հարգելի պատճառների մասին որևէ փաստաթուղթ դատարանին չի ներկայացրել:

Որոշմամբ Դատարանը գտել է, որ փաստաբան Տիգրան Եգորյանը չարամտորեն խուսափել է 2017թ. հունիսի 30-ի ժամը 15:39-ին նշանակված դատական նիստին ներկայանալուց և առանց որևէ հարգելի պատճառի՝ չի կատարել քրեական վարույթն իրականացնող մարմնի կանչով ներկայանալու իր դատավարական պարտականությունը,

ինչով անհարգալից վերաբերմունք է դրսևորել դատարանի նկատմամբ: Դատարանը նաև նշել է, որ տվյալ դեպքում դատական նիստին չներկայանալու հարգելի պատճառների մասին պաշտպանը պարտավոր էր նախապես տեղեկացնել դատարանին, ինչը չի կատարել և իր վարքագծով զրկել է նաև դատարանին պաշտպանի բացակայությունը հարգելի գնահատելու հնարավորությունից:

Դատարանը 30.06.2017թ. կայացրել է «Դատական սանկցիա կիրառելու մասին» որոշում, որով որոշել է *Փաստաբան Տիգրան Եգորյանի նկատմամբ կիրառել դատական սանկցիա՝ պատասխանատվության ենթարկելու վերաբերյալ դիմումով դիմելով փաստաբանական պալատ:*

2. Կարգապահական վարույթ հարուցելու մասին որոշումը.

Պալատի նախագահի 10.08.2017թ. թիվ 230-Ա/ԿԳ-17065 որոշմամբ փաստաբան Տիգրան Եգորյանի նկատմամբ հարուցվել է կարգապահական վարույթ՝ «Փաստաբանության մասին» ՀՀ օրենքի (**այսուհետ նաև՝ Օրենք**) 19-րդ հոդվածի 1-ին մասի 1-ին կետի և Պալատի ընդհանուր ժողովի կողմից 11.02.2012թ. թիվ 1/4-Լ որոշմամբ հաստատված «Փաստաբանի վարքագծի կանոնագրքի» (**այսուհետ նաև՝ Կանոնագիրք**) 4.1 կետի պահանջների խախտման հատկանիշներով:

14.08.2017թ. կարգապահական գործը հանձնվել է կարգապահական գործը նախապատրաստող անձ Նարինե Սարգսյանին (**այսուհետ նաև՝ Նախապատրաստող**):

3. Դիմողի և Պատասխանողների համառոտ բացատրությունները, վկաների ցուցմունքները.

3.1. Դիմողի համառոտ բացատրությունները.

Գործի նախապատրաստման ընթացքում, ինչպես նաև խորհրդի կողմից քննության ընթացքում Դիմողը բացատրություն չի ներկայացրել: Խորհրդի նիստին Դիմողը չի ներկայացել, թեև պատշաճ ծանուցվել է Խորհրդի նիստի վայրի և ժամի մասին:

3.2. Պատասխանողի համառոտ բացատրությունները.

Գործի նախապատրաստման ընթացքում, ինչպես նաև խորհրդի կողմից քննության ընթացքում Պատասխանողը բացատրություն չի ներկայացրել:

Խորհրդի նիստին Պատասխանողը չի ներկայացել, թեև պատշաճ ծանուցվել է Խորհրդի նիստի վայրի և ժամի մասին:

3.3. Վկաների ցուցմունքները.

Սույն կարգապահական գործով վկաներ չեն հրավիրվել:

4. Կարգապահական գործ նախապատրաստողի եզրակացությունը, եզրակացության վերաբերյալ առարկությունները և գործի հանձնումը խորհրդին.

11.10.2017թ. կարգապահական վարույթի գործը նախապատրաստող անձ Նարինե Սարգսյանը կազմել է եզրակացություն, որի համաձայն դատական նիստի ձայնագրությունը հետազոտելու դեպքում պարզ է դարձել, որ փաստաբան Տիգրան Եգորյանը դատական նիստին չի ներկայացել առանց դատարանին նախազգուշացնելու:

Նախապատրաստողը գտել է, որ Պատասխանողի գործողությունները բխել է իր վստահորդի շահերից:

Կարգապահական գործը Խորհրդին է հանձնվել 13.10.2017 թ.:

Խորհրդի նիստը տեղի ունեցել 2018 թվականի մարտի 1-ին, ժամը՝ 19:30-ին, ՀՀ փաստաբանների պալատի վարչական շենքում (ք.Երևան, Զաքիյան 7-2, 4-րդ հարկ, թիվ 12 սենյակ):

Պատասխանողը 01.03.2018թ. միջնորդություն է ներկայացրել նույն օրը ժամը 18.30-ին նշանակված նիստը հետաձգելու մասին նշելով, որ իրար հաջորդող երկու միջոցառումների է մասնակցելու:

Պալատի խորհուրդը մերժել է նշված միջնորդությունը, քանի որ պատասխանողը որևէ ապացույց չի ներկայացրել իր միջոցառումների բնույթի և ժամանակի վերաբերյալ:

5. Գործի հանգամանքները՝ առկա ապացույցների վկայակոչմամբ.

Կանոնագրքի հավելվածը հանդիսացող «Փաստաբանի նկատմամբ կարգապահական վարույթի իրականացման կարգի» (այսուհետ նաև՝ **Կարգ**) 22-րդ հոդվածի 3-րդ մասի համաձայն՝ Պալատի խորհուրդը հիմք է ընդունում Նախապատրաստողի եզրակացությամբ հաստատված փաստերը, բացառությամբ այն դեպքի, երբ գործում գտնվող ապացույցները կամ Պալատի խորհրդին ներկայացված լրացուցիչ ապացույցները՝ սույն կարգին համապատասխան գնահատելու արդյունքում Պալատի խորհուրդն այլ եզրահանգման է գալիս:

Խորհուրդը ուսումնասիրելով գործում առկա ապացույցները, հաշվի առնելով նաև Կարգապահական գործը նախապատրաստողի եզրակացությունը, հաստատված է համարում հետևյալ փաստերը՝

1. Փաստաբան Տիգրան Եգորյանը հանդիսանում է Գևորգ Սաֆարյանի պաշտպանը:

Նշված փաստը հաստատվում է դատական սանկցիա կիրառելու մասին որոշմամբ, դատական նիստի ձայնագրությամբ:

2. Փաստաբան Տիգրան Եգորյանը մասնակցել է թիվ ԵԱԴԴ/0028/01/17 քրեական գործով 30.06.2017 թվականի դատական նիստին: Դատական նիստը ժամը 14:30-ին ընդմիջվել է մեկ ժամով, փաստաբան Տիգրան Եգորյանն ընդմիջումից հետո դատական նիստին չի ներկայացել և չներկայանալու պատճառների մասին դատարանին տեղեկություն չի հայտնել:

Նշված փաստը հաստատվում է դատական սանկցիայի որոշմամբ, դատական նիստի արձանագրությամբ (դատական նիստի ձայնագրառում 14:30:27–14:30:31; 15:39:38-15:39:46)

6. Պատասխանողի անձը բնութագրող հանգամանքները.

Պալատի ընդհանուր դեպարտամենտի ղեկավարի կողմից տրված տեղեկանքի համաձայն՝ փաստաբան Տիգրան Եգորյանը փաստաբան է հանդիսանում 15.10.2011թ., և 2015-2017թթ. ընկած ժամանակահատվածում վերջինիս նկատմամբ 12 անգամ հարուցվել է կարգապահական վարույթ (9 ավարտված վարույթ և 3 ընթացիկ վարույթ), որոնց մեջ չի հաշվարկվում սույն կարգապահական վարույթը: 6 վարույթ Խորհրդի 03.03.2016թ. թիվ ԿԳ/46-Ա, 03.10.2016թ. թիվ ԿԳ/107-Ա, 31.10.2016թ. թիվ ԿԳ/157-Ա, 31.10.2016թ. թիվ ԿԳ/158-Ա, 11.11.2016թ. թիվ ԿԳ/162-Ա, 11.11.2016թ. թիվ ԿԳ/163-Ա որոշումներով կարճվել է:

Խորհրդի 23.11.2016թ. թիվ ԿԳ/188-Ա որոշմամբ Կանոնագրքի 2.2.3 ենթակետի խախտման համար Տիգրան Եգորյանը ենթարկվել կարգապահական տույժի՝ նկատողության ձևով, որը բողոքարկվել է դատական կարգով:

Խորհրդի 16.10.2017թ. թիվ ԿԳ/92-Ա որոշմամբ Կանոնագրքի 2.7.2 և 2.6.1 ենթակետերի խախտման համար Տիգրան Եգորյանը ենթարկվել է կարգապահական տույժի՝ իր հաշվին 8 ժամ լրացուցիչ վերապատրաստման դասընթացների մասնակցություն քրեական դատավարության բնագավառի թեմայով, որը դատական կարգով բողոքարկվել է:

Խորհրդի 22.02.2018թ. թիվ ԿԳ/24-Ա որոշմամբ Կանոնագրքի 4.1 կետի խախտման համար Տիգրան Եգորյանը ենթարկվել է կարգապահական տույժի՝ նկատողության ձևով, որն ուժի մեջ չի մտել:

7. Պալատի խորհրդի պատճառաբանված եզրակացությունը և որոշումը.

Պալատի խորհուրդը գտնում է, որ փաստաբան Տիգրան Եգորյանը ենթակա է կարգապահական պարասխանարվության՝ Կանոնագրքի 4.1 կետի պահանջների խախտման համար, իսկ «Փաստաբանության մասին» ՀՀ օրենքի (այսուհետ նաև՝ Օրենք) 19-րդ հոդվածի 1-ին մասի 1-ին կետի խախտման մասով կարգապահական վարույթը ենթակա է կարճման՝ հետևյալ պարճառաբանությամբ.

7.1 Կանոնագրքի 4.1 կետի խախտման մասով.

Օրենքի 39-րդ հոդվածի առաջին մասի համաձայն՝ փաստաբանը ենթակա է կարգապահական պարասխանարվության սույն օրենքի և փաստաբանի վարքագծի կանոնագրքի պահանջները խախտելու համար:

Հայաստանի Հանրապետության քրեական դատավարության օրենսգրքի 314.1-րդ հոդվածի 1-ին մասի 4-րդ կետը սահմանում է. **«Դատարան ներկայանալուց չարամտորեն խուսափելու կամ դատավարական իրավունքներից անբարեխղճորեն օգտվելու կամ դատավարական պարտականություններն անհարգելի չկատարելու կամ ոչ պարզաճ կատարելու, դատավորի օրինական կարգադրությունները չկատարելու, դատական նիստի բնականոն ընթացքը խոչընդոտելու կամ նիստի կարգը խախտող այլ գործողություն կատարելու միջոցով դատարանի նկատմամբ անհարգալից վերաբերմունք դրսևորելու դեպքում դատարանն իրավունք ունի քրեական դատավարությանը մասնակցող անձանց և դատական նիստին ներկա գտնվող այլ անձանց նկատմամբ կիրառելու հետևյալ սանկցիաները 4) պարասխանարվության ենթարկելու վերաբերյալ դիմումով համապարասխանաբար գլխավոր դատախազին կամ Փաստաբանական պալատի դիմելը:»:**

Կանոնագրքի 4.1 կետի համաձայն՝ փաստաբանը, ով ներկայանում է կամ մասնակցում է գործին դատարանի կամ արբիտրաժային տրիբունալի առջև, պետք է ենթարկվի այդ դատարանի կամ տրիբունալի կողմից կիրառվող վարվելակերպի կանոններին, այդ թվում հարգանքով վերաբերվել դատավորին և դատավարության մյուս մասնակիցներին: Այդ կանոններին ենթարկվելու պարտականությունը չի սահմանափակում փաստաբանի՝ դատավորի կամ արբիտրի գործողությունների դեմ առարկելու կամ այլ դատավարական իրավունքներից օգտվելու հնարավորությունը: Փաստաբանը դատարանի հանդեպ ճշգրիտ հարգանք և համակրանք դրսևորելու հետ միաժամանակ պետք է իր վստահորդի շահերը պաշտպանի անկաշկանդ և անվախ՝

հաշվի չառնելով իր անձնական շահերը կամ ցանկացած հետևանքները, որոնք կպատահեն իր կամ ցանկացած այլ անձի հետ:

Նշված կանոնը նաև վկայակոչող (բլանկետային) է, քանի որ հղում է կատարում փաստաբանի և դատարանի փոխհարաբերությունները կարգավորող այլ իրավական ակտին, տվյալ դեպքում՝ ՀՀ քրեական դատավարության օրենսգրքին:

ՀՀ քրեական դատավարության օրենսգրքի 73-րդ հոդվածի 5-րդ մասի 1-ին կետի համաձայն՝ **պաշտպանը պարտավոր է կասկածյալին և մեղադրյալին իրավաբանական օգնություն ցույց տալու համար ներկայանալ քրեական վարույթն իրականացնող մարմնի կանչով:**

Վերլուծելով վերը նշված կանոնների պահանջները, Խորհուրդը գտնում է, որ սույն գործով պարզման ենթակա է այն հանգամանքը, թե.

արդյո՞ք Պատասխանողն առանց հարգելի պատճառի դատական նիստին չի ներկայացել՝ դրանով անհարգալից վերաբերմունք դրսևորելով Դատարանի նկատմամբ:

Խորհուրդը հաստատված է համարում, որ Պատասխանողը մասնակցել է թիվ ԵԱԴԴ/0028/01/17 քրեական գործով 30.06.2017 թվականի դատական նիստին: Դատական նիստը ժամը 14:30-ին ընդմիջվել է մեկ ժամով, փաստաբան Տիգրան Եգորյանն ընդմիջումից հետո դատական նիստին չի ներկայացել և չներկայանալու պատճառների մասին դատարանին տեղեկություն չի հայտնել:

Խորհուրդն արձանագրում է, որ սույն կարգապահական գործի քննության ընթացքում Պատասխանողի կողմից չեն ներկայացվել բացատրություններ դատական նիստին չմասնակցելու պատճառների վերաբերյալ:

Վերոգրյալը հաշվի առնելով՝ Խորհուրդը գտնում է, որ Պատասխանողն առանց հարգելի պատճառի դատական նիստին չի ներկայացել՝ դրանով անհարգալից վերաբերմունք դրսևորելով Դատարանի նկատմամբ:

7.2 Օրենքի 19-րդ հոդվածի 1-ին մասի 1-ին կետի խախտման մասով.

Օրենքի 19-րդ հոդվածի 1-ին մասի 1-ին կետի համաձայն՝ *փաստաբանը պարտավոր է ազնվորեն և բարեխղճորեն պաշտպանել վստահորդի իրավունքները և օրինական շահերը Հայաստանի Հանրապետության օրենսդրությամբ չարգելված բոլոր միջոցներով ու եղանակներով:*

Սույն իրավադրույթի նորմատիվ էությունը կայանում է նրանում, որ փաստաբանը, ելնելով իր իրավապաշտպան գործառույթից, պարտավոր է դրսևորել իր նշված գործառույթով պայմանավորված հասարակական հատուկ կարգավիճակին հարիր ազնիվ վարքագիծ վստահորդի հետ հարաբերություններում և առավելագույն ջանքեր գործադրել իր վստահորդի շահերը բոլոր օրինական միջոցներով պաշտպանելու ուղղությամբ:

Խորհուրդը գտնում է, որ սույն կարգապահական գործի քննության ընթացքում չեն ներկայացվել այնպիսի ապացույցներ, որոնցով կհաստատվեր Պատասխանողի կողմից Օրենքի 19-րդ հոդվածի 1-ին մասի 1-ին կետի խախտում թույլ տալու հանգամանքը:

Ուստի՝ Խորհուրդը գտնում է, որ Օրենքի 19-րդ հոդվածի 1-ին մասի 1-ին կետի խախտման մասով կարգապահական վարույթը ենթակա է կարճման:

Կարգապահական տույժի ընտրությունը

Օրենքի 39.9 հոդվածի 2-րդ մասի համաձայն՝ *փաստաբանի նկատմամբ կիրառվող կարգապահական տույժը պետք է համաչափ լինի կատարված խախտմանը:*

Կարգապահական տույժ կիրառելիս փաստաբանների պալատի խորհուրդը հաշվի է առնում նաև խախտման հետևանքները, փաստաբանի անձը, մեղքի աստիճանը, առկա տույժերը, փաստաբանին բնութագրող ուշադրության արժանի այլ հանգամանքներ:

Անդրադառնալով նշանակվելիք կարգապահական տույժի տեսակին՝ Պալատի խորհուրդը՝ հաշվի առնելով վերոհիշյալ հանգամանքները, այդ թվում՝ խախտման բնույթը և փաստաբանի անձը բնութագրող հանգամանքները, գտնում է, որ փաստաբան Տիգրան Եգորյանի նկատմամբ պետք է կիրառել տույժ՝ նկատողության ձևով:

Վերոգրյալից ելնելով և ղեկավարվելով՝ Օրենքի 10-րդ հոդվածի 5-րդ մասի 14-րդ կետի, 39-րդ հոդվածի 1-ին մասի, 39.7.- րդ հոդվածի 5-րդ մասի, 39.8.-րդ հոդվածի 1-ին մասի 2-րդ, 39.9.-րդ հոդվածի 1-ին մասի 1-ին կետի, ՀՀ Փաստաբանների պալատի կանոնադրության 16.26-րդ կետի, Կարգի 28-րդ հոդվածի 1-ին մասի 2-րդ և 30-րդ հոդվածի 5-րդ մասի պահանջներով խորհուրդը՝

Ո Ր Ո Շ Ե Ց՝

1. Փաստաբան Տիգրան Եգորյանին (արտոնագիր՝ թիվ 1187) ճանաչել մեղավոր Փաստաբանի վարքագծի կանոնագրքի 4.1 ենթակետի պահանջների խախտման համար:

2. Փաստաբան Տիգրան Եգորյանի (արտոնագիր՝ թիվ 1187) նկատմամբ կիրառել կարգապահական տույժ՝ նկատողություն:

3. Փաստաբան Տիգրան Եգորյանի (արտոնագիր՝ թիվ 1187) նկատմամբ Փաստաբանության մասին օրենքի 19-րդ հոդվածի 1-ին մասի 1-ին կետի պահանջների խախտման հիմքով հարուցված կարգապահական վարույթը կարճել:

4. Հանձնարարել Պալատի աշխատակազմի ղեկավարին՝ սույն որոշման մասին իրազեկել կողմերին:

Ծանոթություն. Սույն որոշումը կարող է բողոքարկվել դատական կարգով՝ այն ստանալու օրվանից մեկամսյա ժամկետում: Սույն որոշումն օրինական ուժի մեջ է մտնում սույն կետով նախատեսված բողոքարկման ժամկետն անցնելուց հետո:

**ՀՀ փաստաբանների պալատի
խորհրդի նիստը նախագահող՝**

Տարոն Սիմոնյան

**01 մարտի 2018թ.
թիվ ԿԳ/30-Ա
ք. Երևան**